

CLAUDIJA HASANBEGOVIĆ, ARGENTINKA BH. KORIJENA, ISTRAŽIVAČ MEĐUNARODNOG INSTITUTA ZA ISTRAŽIVANJE KRIMINALA

Čekam poziv iz BiH

Sa 22 godine je postala advokat i zastupala zlostavljane žene i djecu, u Hagu magistrirala, u Kentu doktorirala, a danas predaje kriminologiju i istražuje sličnosti između silovanja i prisilnih trudnoća tokom rata, prisilne prostitucije i porodičnog nasilja

Južnoamerički kontinent je dom vrlo maloj zajednici osoba porijeklom iz Bosne i Hercegovine, ali to nije spriječilo **Claudiju Hasanbegović**, Argentinku bosanskih korijena, da postane jedan od vodećih istraživača Međunarodnog instituta za istraživanje kriminala (IICI) u oblasti rodno zasnovanog nasilja i seksualnih zločina kao međunarodnih zločina.

TRENUTAK DA DOĐE

Impresivnu karijeru je započela već u 22. godini kada je postala advokat, nakon čega je osam godina na argentinskim sudovima zastupala zlostavljane žene i seksualno zlostavljano djecu. Poslije toga je došla u Evropu, na postdiplomske studije.

Prvo je u Hagu, na Institutu za društvene nauke, magistrirala na temu *Žene i razvoj*, a onda je u engleskom Kentu doktorirala iz oblasti socijalne politike. Sve to je potom kompletirano na Međunarodnom univerzitetu za žene u Hanoveru nakon čega je prošla obuku UN Womana.

Osim istraživačko-konsultantskih poslova, Hasanbegovićeva predaje i kriminologiju na Pravnom fakultetu Nacionalnog univerziteta Lomas de Zamora, te na još nekoliko drugih univerziteta, a trenutno istražuje sličnosti između silovanja žena i prisilnih trudnoća tokom rata, prisilne prostitucije i porodičnog nasilja.

- **Nasiljem nad ženama i djecom se bavim još od 1989. godine. Nažalost, nikada nisam bila u BiH i nemam nikakvog kontakta s institucijama u BiH. Jako bih željela da ostvarim neku saradnju, da podijelim svoja znanja i iskustva, ali bih svakako iskoristila priliku da istražim i potražim svoje korijene i možda neku familiju** - priča Hasanbegovićeva za Start BiH.

Tokom školovanja u Njemačkoj upoznala je Monicu Hauser iz organizacije *Medica Mondiale*.

- **Ona nam je govorila o svom iskustvu i velikoj hrabrosti i snazi Bosanaca i Hercego-**



vaca koji su preživjeli rat. Ove godine sam upoznala i sjajnu Bosanku Vedranu Mladinu, koja je odlučna da mi pomogne u mom dolasku u Sarajevo. Veoma sam otvorena za bilo kakvu saradnju, seminare i susrete iz ove oblasti i mislim da je sada pravi trenutak da dođem - kaže Hasanbegovićeva, ne skrivajući iznenađenje našim pozivom.

A KO JE ZGODNIJI?

Kontakt sa ljudima iz bivše Jugoslavije imala je, kaže, pukom slučajnošću 1994. godine, kada je učestvovala na Forumu o ljudskim pravima koji je organizovao argentinski nobelovac Adolfo Perez Esquivel.

Naime, s obzirom na to da je Argentina primila mnogo imigranata iz svih dijelova svijeta, pokušalo se za isti sto dovesti predstavnike Hrvata, Srba, Bošnjaka, Slovenaca i Crnogoraca. Međutim, pošto je organizatorima jedini predstavnik Bošnjaka kojeg su našli odbio poziv, sasvim slučajno su nju pronašli preko neke studentske liste.

Iako BiH i Argentina možda nemaju previše političkih ili trgovinskih dodirnih tačaka, strast za najvažnijom sporednom stvari na svijetu,

fudbalom, nesumnjivo je podjednaka, a upravo ove dvije selekcije će se u istoj grupi boriti za prolaz u osminu finala na predstojećem Svjetskom prvenstvu u Brazilu.

S obzirom na to da je rođena u Argentini, a da joj mama ima špansko-italijansko porijeklo, Hasanbegovićeva priznaje da joj neće biti lako izabrati selekciju za koju će navijati.

- **Za koga ću navijati u susretu između Argentine i BiH je dosta teško pitanje, a vjerovatno ću podržati zgodniji tim** - kaže ona sa osmijehom.

Njeno viđenje zbirnog komentara argentinske sportske javnosti nakon izvlačenja grupa za Svjetsko prvenstvo 2014. je jednostavno.

- **Generalno govoreći, Argentinci su veoma zadovoljni grupom jer im je najvažnije da su izbjegli ostale južnoameričke selekcije, Italiju, Njemačku i Francusku. Međutim, svojim kolegama i prijateljima stalno govorim o tome da su bosanski igrači odlični i spremni i da se Argentina nipošto ne smije nadati nekom laganom meču. Nažalost, vijesti iz fudbala su vrlo brzo zasjenili nemiri, koji su nastali zbog policijskih protesta za povećanjem plata, što je dovelo do masovnih pljački i nekoliko pogibija. Trenutno to apsolutno dominira u argentinskim medijima** - kaže Hasanbegovićeva, uz opasku da mnogi smatraju da će Svjetsko prvenstvo poslužiti vlastima za skretanje pažnje javnosti sa mnogo važnijih unutrašnjih problema u Argentini.

(z.č.)

STARA RAZGLEDNICA ZA DOBRO JUTRO

Iako je o *uspomenama iz Bosne* teško govoriti rođenoj Argentinki koja ovdje nikad nije bila, **Claudia Hasanbegović** se iz djetinjstva sjeća stare razglednice sa sarajevskom džamijom u pozadini, koja je nekada davno stigla od rodbine iz BiH.

Danas se sjeća i nekoliko riječi i fraza iz bosanskog jezika koje su spominjane u kući dok je bila mala: *draga moja, ja te volim puno, laku noć, dobro, dobro jutro, dobar dan...*